

淞

故

述

藝海珠塵

史部地理類

南匯 吳 省蘭 泉之輯

攸縣 賀 鑒 仁望校

淞故述

楊

樞簪

權字運之江南華亭人明嘉靖戊子科舉人官江西臨江府同知

雲間九峯陸寶爲二峯其土空樹人爭取之夷爲平陸矣定庵曹公時中擬以簾山補之有九峯補亡詩山頭日月長吞吐山下亂石難名數小者臥伏如羣羊大者蹲踞如虬虎生材中矢因得名十笏天留給孤士茲山合補九峯亡後世視今應作古又以盤陀石雨花洞玉

寶泉箬簾竹爲四詠各有詩先是鶴灘錢公福嘗作檄  
小山補之然小山蓋橫雲之餘壤也故又名小橫山勢  
不可二簾在諸山之北與鳳凰對峙進簾次之於義亦  
協

湖渚之水皆發源蘇之太湖故每風自西北來則水患  
暴溢治水者惟浚吳淞江入海浚白茆以入大江太湖  
之勢分則松無水患夏忠靖公嘗試之矣正德辛巳冬  
季司空充嗣復浚二水動三郡之衆費巨萬當時頗有  
訕者今十餘年雖雨浹旬而無大患皆其力也司空四  
川內江人

山東未息馬山西尙揮戈急起州縣兵北開白茆河海  
風裂面天雨雪山高水深不見月萬人鑿土如鑿山河  
邊死者誰收骨白茆河成如白虹百里直與昆城通將  
軍不待驅鬼工平地遂作魚龍宮問誰愛民如愛子華  
亭盛侯古莫比昔去今還悲復喜非汝身爲白茆鬼盛  
之德河之水千古萬古流無已此清江貝公瓊贈盛彥  
忠白茆歌也彥忠廣陵人元末年爲華亭丞

通海易塞海難請君反復思兩端雨暘愆期致涉乾此  
與時政還相干人力回天亦良艱惟是築堤護圩田此  
策若舉人心安單舸寡從相周旋東西徧閱陌與阡佚

道便民省督鞭低者增築令高堅破者補綴令完全可  
以蓄洩防未然道元水經有本源守敬議論非腐酸前  
元特設水監官仁發姓任號月山此老水利亦精專令  
君奇胸萬卷蟠取用不竭如淵泉縱橫曲直珠走盤但  
厚民力毋傷殘眼前活法人所便古人陳迹亦蹄筌吾  
君吾相聖且賢將舉廢墜起陂偏和氣充塞位兩間堯  
水湯旱非所患側聞西潭過高軒移時不出吏候門方  
且索我詩稿看感君西臺舊歲寒不惜千里披心肝此  
西潭陳公章寄祝水部詩也弘治甲寅工部徐侍郎貫  
治水江南議開白茆港洩水于海時西潭武瑞州聞而

寄之錄備一說

西潭公以刑部郎中調佐瑞州時太守尙縉適滿任庫  
有餘銀積至萬兩將自入公至守知不可隱乃欲以其  
半汙公公不可卽請于上官而附諸籍門人錢福誌其  
墓不及此用表出之

俞憲許公璘致仕日里人有被誣者以五十金託蒙古  
賽氏子丐公白之公知其誣直于官得釋而賽竟匿其  
金不以酬後里人以賽面質於公公謝有之前輩厚德  
如此

宋太史潛溪先生嘗作松隱菴記有云今之細民竭三

時之力欲其室廬之完饘粥之充而不可得釋氏之徒  
皆坐而享之苟不力求其道無忝于大雄氏之教則因  
果之皎然者甚可懼也其論甚正而足以寒緇流之心  
今志不載此碑當命其徒刻而傳之亦不爲無助

王少參珪以戎籍入金山學與羅義爲友並有時名景  
泰庚午羅魁南畿有司表其閭珪誓不第不過其門癸  
酉珪舉于鄉甲戌第進士人稱其有志性剛介成化中  
郡守有恣科罰者珪佯立券貸之守慙而止有縣令酷  
暴者珪使人持其杖歸暴亦少減前輩剛直之風今亡  
矣夫

府志稱布名吉貝按南史外夷傳林邑國吉貝樹其華  
成時如驚毳抽其緒紡之以作布與苧布不殊則知所  
云乃北方之詞而松人遂以爲布之名誤矣

西郊笑端集序有曰皇明初松江之善詩者御史袁景  
文爲最判官陳文東鄉貢進士陸宅之江西僉事董良  
史處士吳子愚輩亦相頡頏會稽楊廉夫避地而居松  
其才膽氣雄震耀當世則一時才士皆宗之往往高古  
不逮詭怪層出又景文輩所不屑也自後漸入纖巧初  
學惑之識者惟宗景文焉雪航稿序有曰顧謹中有四  
壞奇簡知高皇而有經進錄行世袁景文在野集之渾



厚含蓄識老謂遠近盛唐管時敏蚓竅集之清麗優柔  
謂可與袁方駕他若張樞張璧吳子愚輩亦各成家有  
足傳者按二序東海張公筆也雖爲良史公至言而國  
初淞江詩人之評則盡在是矣

鐵崖先生字廉夫則維楨字當從木而往往見其真蹟  
有作禎字嘗以爲疑近偶以其所識歲月求之始得其  
意蓋國初諸王有諱楨者先生之從示皆入國朝書也  
推此亦可以驗其書之真僞

漳州府志有王源者字啓澤龍巖人同知松江府事奏  
罷重額糧三十四萬餘石逋負糧三十九萬餘石

朱保等號五虎饑害鄉里源以法繩之五虎害息刁民  
褚路等誣奏二百餘家謂以左道惑民逮繫甚衆悉平  
反之以母老乞終養民遮留不可得留其靴以去今按  
一統志源以甲申庶吉士歷職方郎知潮州府而不及  
同知前後松志止載源姓名而不著始續此獨見於漳  
志願以爲疑然松志宣德五年二月二十一日勅減本  
府稅糧共計三十萬二千八百八十五石茲固朝廷之  
德意蓋亦必有先者且知府趙公豫是年始任則此爲  
源所奏減無疑及讀杜宗桓所上周文襄公書謂兩奉  
詔書勅諭自宣德七年以前拖欠糧草悉皆停徵則源

所奏罷通貢之糧也夫源功在松甚大而今無有能道之者矣嗚呼世固有爲而弗傳獨源也哉

浦江鄭珠字彥平元至正中任松江等處稻田提領所大使嘉定華亭上海之交有田二十頃餘既隸所中而鄰水使者及江淮財賦府復重賦之民曰困甚銖爲聞于朝免之先是徵民無藝歲有羨糧萬餘斛上下共利之習以爲常銖至即命急還于民吏爭以無主名爲解弗聽乃計家口數分之聖門而拜者以千數稻田所素號米穀之府而爲之使者又撝攬其綱他人靡不思遂其欲而銖日糴于市處之猶貧人宋潛溪先生銘其墓

載其事甚悉按元季籍沒米國珍管明之田以與丞相脫脫故立稻田提領所掌之而江淮財賦府則領故宋后妃之田以供太后者也憶處權門角立之下而能免復賦之田當貨利羨餘之會而能守不貪之寶古之所謂能吏廉吏蓋兼之矣可無聞也乎

朱顯忠如臯人元季嘗爲張士誠守松江丙午冬俞通海兵臨太倉崑山嘉定等處皆附顯忠知天命有在以城降後守文州死節贈鎮國將軍見功臣錄而統志則繫于揚州按府志丙午年王立中爲守則所謂守松江者蓋閫帥之寄也

元末松江屢罹兵火經史子集無遺而教事幾廢矣甲辰王公立中來知府首務興學延五經師訓迪子弟真購求十三經註疏等書藏于學士習一新自是科目人才甲江南立中三子璉吏部主事汝玉春坊贊善汝嘉翰林侍講君子以爲善政之報

景泰中饑郡守賑濟多中而少給識者謂此人必無後已而果然孰謂天之視聽遠哉因並表之以爲長民者勸

唐陸宣公贄松故無專祀正德庚辰推官周公佐始毀靈順宮爲之祠請祀于朝其畧曰臣正祀典國之大事

古先哲王生於其鄉沒則廟食于其土所以崇德報功  
風勵天下唐中書侍郎平章事陸宣公贄世傳嘉興人  
稽之載籍錢起送贄弟擢第還鄉詩有曰鄉路歸何早  
雲間獨擅名華亭養仙鶴指日再飛鳴則贄之生于華  
亭無疑時縣方爲鎮隸于秀州故贄爲嘉興人而廟在  
焉元至元中縣始別陞爲府且易今名而贄之祠在故  
郡者因弗徙由唐以來殆且千載桑梓故墟獨未有爲  
之祠者稽之郡典陸遜父子華產也翊戴孫吳而三賢  
有祠春秋致祭贄之在唐學究天人志存經世偶遭遇  
德宗屬時多艱謀謨帷幄剪除羣兇功在社稷文章節

善治理  
氣師表百世先正謂其功業赫然心行不戾於聖賢之  
道其視陸遜父子以智謀翊戴偏方不啻砥硤之與美  
玉一祀一否輿情未愜非所以示褒崇之道昭勸戒之  
方府治西南有曰靈順行宮乃郡人以奉五顯靈官者  
臣嘗因其爲厲毀其像設而廟固存遂上白巡撫改立  
贊祠肖像其中第祀典未昭有司無所承命以供祀事  
乞賜詳定犧牲籩豆祝帛品數致祭永爲遵守疏奏下  
禮部部乃令翰林撰文官府于春秋次丁致祭按松嘉  
二郡之士各以爲宣公生于其鄉而不能決周公此疏  
誠斷案矣

樂宗茂浙仁和人以進士同知府事弘治戊申署上海  
事食河豚而美旣徹問有餘則侍卒旣食之矣更烹以  
進倉猝不熟下咽而死卒懼徙其屍縊廁中以自免宗  
茂政事有可觀者時以其自經也槩以貪人懼敗者之  
常目之亦寃矣

河豚之美惡前輩論之詳矣予鄰有周姓者與九人共  
食而死其八人竟無恙夫松人每以遇毒歸罪于修治  
之不佳而不知人有虛實厚薄之不同故有死有不死  
且人參葯之美者也而人亦有不能勝者況毒人之物  
哉養大君子不食可也



定菴先生爲雲南僉事時分巡所過必有題詠書壁間  
比反則屬和殆盡詞翰皆可觀先生問之始知爲從行  
指揮某也後某以罪謫當落職先生特釋之及以憂歸  
某持三百金爲報先生卻之復益五百先生厲色曰吾  
惜汝才耳豈有私耶竟不受

景泰中有以進士第二人入翰林者頗自矜炫後因歸  
省東海先生作文贈之其畧曰昔司馬相如拜中郎將  
歸蜀太守郊迎縣令負弩矢先驅鄙人榮之沂公王曾  
及第歸青州郡守軍帥率父老具樂郊迎公乃從問道  
入謁不敢當禮論士者不必究其始終于一端窺之亦

可知其成就矣近時以僥倖一得往往效相如所爲以  
誇市寵婢吾嘗竊爲世俗歎今君賜告歸省吾雲間之  
仕于朝者道衣錦之榮備矣予妄以沂公之事望之亦  
挽流俗之一機也觀此前輩直諫之風猶可想見

默易臺鳳山朱應祥讀易之所也應祥性迂狂嘗謂錢  
文通公曰予在默易臺讀公詩之不善處恨不得長竿  
一擊公頭也應祥于文通公爲後輩而其放言如此

夢菴陸潤玉之女名娟自少穎異授以書史輒憶不忘  
長亦通敏不妄言動有索其父送行詩者父不在爲代  
作云津亭楊柳碧參參人面東風酒半酣萬點落花舟

一葉載將春色過江南父歸責之自是吟咏絕不及門外事及歸馬龍姑亡事舅至孝舅沒託以二女乃置淨室與之同寢處者十年既嫁始復夫室無出爲夫買妾而生一子將卒以所作稿悉焚之曰非婦人事也夫婦人事筆硯者恒有于天下而有難能之事如陸者豈能得哉夢菴之孫稔厚交于予故聞之詳

夢菴先生西涯文正公門人也八月十五爲先生初度日壬申歲先生壽八十一西涯寄詩壽之有曰八十一迴秋月圓自是每歲必寄有八十幾迴秋月圓之句且謂當易起例西涯旣歿松之士大夫猶循其例不廢辛

已先生壽九十而以初度前五日卒謂非識歟

府學鄉貢題名石同知王源撰文知府徐季書篆按前後郡志皆逸徐姓名然與王同官則其宦次當在趙公之前

華亭丞俞仲璫志逸其名獨見於清江集之霜林說且曰仲璫蚤歲讀書績文有聲吳越間其去而家于九峯也人且以其抑鬱無聊不能終日乃以霜林爲況則知動心忍性懲其所已悔而益所不能矣仲璫會稽人蓋亦因宦而居於松

鄉貢進士許瓊府志止載姓名而他無所紀惟東海有

送計廷玉復任序按廷玉宰封邱縣藩臬皆考其廉愛以不能事權勢乞歸當道不許故復任則其人亦有可述者

成化末有顯宦滿載歸者一老人踵門拜不已宦駭問故對曰松民之財多被官府搬去今賴君返之敢不稱謝宦愧不能若

李宗伯至剛之子源舉進士其孫桓方髫髻出見客曰令尊新進士桓應聲曰家祖舊尚書客有戲之曰兩猴解木於山中小猢猻也會劉鋹桓應曰一馬陷足于沙內老畜生安敢出蹄時人稱爲李做對後領鄉薦仕終

知府

近見唐飭軒所藏黃汝申憲長手評宋仲彛陳東文書  
二條各與二筆法酷類蓋學昌黎樊宗師墓志云

錢文通公嘗爲其先人築墳北山官沒民助之有畀土  
失期者公怒詰之對曰方在黃廉使墳上取土來故遲  
耳公默然吁公之宰木今亦幾盡矣

松江學無專志而其因革附見于府志樞嘗欲輯記所  
聞未果也然廟學科目書器之類具有可稽而學之官  
遷代無恒不可無述謾具如左

學官表

松之守令咸有題名而學官獨缺焉豈不以其職之卑  
畧之耶然刑範之地其重於守令埒可無監觀哉作學  
表官表

教授

分教

元 張夢應二十二年在任

至元

元貞 馬允中二年在任

周因二年在任學正

劉蒙

唐純二年在任學錄

延祐

沈德華元年在任

薛鐵七年在任

重紀

林聖予

至元

至正

倪駿九年任

孫成直學

施璠宣州人

胡存道十六年任訓

陳仲微

導會稽人

高志道通州人二十一

年任

馮恕字仁伯會稽人二

錢璧字伯全華亭人

十三年在任

十七年在任訓導

陶植錢塘人二十五年

張誼海昌人十九年



在任

在任學正

張庸松陵人十九年

在任學錄

張節華亭人十九年

在任直學

王文澤字伯雨華亭

人訓導

邵亨貞字復菴淳安

人占籍華亭以下訓

導

國朝  
洪武

杜洵字季文浙江台州人古籍華亭

貝璵字仲昭嘉興人至正二十四年任陞國子監助教

楊基字孟威蘇州人歷陞山西按察使全思誠字希賢上海人召爲文華大學士兼左中允

邱民字克莊歷陞禮

部侍郎

王嘏字伯純維揚人

十一年在任

張樞字夢辰上海人

明經

曹睿字新民永嘉人

占籍松江

王彥文華亭人陞嘉

興教諭

葉原白錢塘人占籍

華亭

馬兼善會稽人占籍

華亭

楊斌華亭人官至清

紀郎

魏驥字仲房蕭山舉

人在任十二年歷陞

南京吏部尙書

韓陽字伯陽山陰人

歷陞布政

吳讓華亭人舉人

宣德

鄭興宗元年在任

瞿遠元年任

孫鼎字宏鉉江西廬

王溥元年任

陵人舉人九年以浦

江教諭陞任滿九載

荐爲監察御史總南

畿學政

正統

王禮江西人九年在任

劉嶽

陳仲仁

徐景

江漢字朝宗建陽人

戒化

葉榮江西進賢人九年

胡昇福閩縣人

在任

周復江西吉水人

因禮

因當作周

魯璵山陰人

弘治

朱仁和人五年任

蕭雅

陳惟卒慈谿人十年任

鄧敏

黃琮

汪集餘姚人舉人十五

王文華

年任

唐珪

朱鑣

陳新

聞與

正德

宋隆趙州人已未進士

五年以同知降任彭鍊

楊霽

江西舉人六年以學正

周瑄鄞縣人

陞任九年憂去

趙儒

譚璋廣西桂林人舉人

林沐莆田人

十一年以教諭陞罷歸

孫濟

王度臨海人癸未進士

胡柏浙江永康人

二年陞南京工部屯田

高明湖廣巴陵人

司主事

胡慶山陰人

程節江西南城人舉人

魏寶廣西桂林人

七年任十年陞鹽城知

詹澤鉛山人

縣

王魯莆田人

王儒福建龍溪縣人

劉祖震湖廣華容人

羅昕吉水人六年任

李文廣西馬平人舉

人八年任



華亭學聚奎亭弘治辛亥縣令汪公崑所建也明年東  
江顧先生清魁南畿龍山張先生弘至第五人嘉靖壬  
午璉公豹葺而新之東江先生有詩云三十年前慶落  
成白頭重見此崢嶸江山不息英靈氣星漢遙增日月  
明謾學魯人歌在泮敢先周彥試吹笙天機未欲分明  
語夢裡泥金有姓名先生嘗有異夢故及之明年徐內  
翰階賜及第

府學天藻亭巳丑郡守長沙熊公宇建以藏敬一箴教  
授程公煥書扁

讀書堆舊有大樹成化初猶存九峯曹先生泰有詩山

中古木長松樹剝落龍鱗大十圍涉歷冰霜心獨苦戰  
手風雨勢將飛白雲留影落僧榻金粉團香薰客衣四  
十年前曾見說于今飽看坐忘歸

九峯過黃浦詩月照黃龍浦水黃南飛鳥鵲夜茫茫晚  
潮天接海門近秋草城垣滬瀆荒道上人家金井塌縣  
中官酒玉缸香秋來直欲通宵飲消得先生醉幾場中  
二聯逼盛唐矣

顧利賓過松江詩吳松三萬木千頃震澤與之俱渺茫  
鴻鴈一聲天接水兼葭八月露爲霜秋風漫引漁人笛  
落日偏驚買客航三十年前此來往塵纓猶未濯滄浪

利賓鎮江人洪武中仕於朝

成化中有楊推官者素疾一吏常欲與之法弘治庚戌知府鄧陵劉公入覲而吏適役于吏部給劉曰銓曹有言有司之不職者必曰松江推官入對宜慎及審官至楊名而劉不能對遂至落職吏不暇較而責備之論亦  
有歸矣

正德壬申流賊寇山東諸郡江南震恐松城四周故有市廛有司悉命撤之復欲絕四濠之梁民甚不便龍困威詔有詩曰人情洵語浮輦腹裏千愁未易銷戰艦未收河朔賊居民虛斷蒲西橋天須向曙星初滅樹必

經秋葉始飄不似十年前  
意況青樓明月喚吹簫  
此詩紀一時之事而其命意亦不淺

衛文節公專祀于崑山其祠堂記云墓在湖州今玉屏山之麓相傳有衛狀元之墓蓋後人附會云

擊壤歌民樂有賢令也姑緝麻婦紡花丁男在田女在家吏卒不下鄉官無橫科差老翁弄兒孫逐影向壁壘東鄰酒西鄰茶從朝至暮笑呀呀布穀昨夜鳴村村補桑麻不違農作時今年落秧早愛民如子縣令心無事擾民如此好夫撒秧妻採桑農事已興蠶事忙大麥熟萐莆秀小麥華華長菜花半稀青間黃今年縣官好民害

不下鄉田家得安樂出入無驚惶日力豈敢嬉夜共燈  
燭光催了機上布便是囊中糲飢寒庶可免逋負亦可  
償不患心頭損新肉只要眼前盤舊瘡此歌董良史所  
作不知賢令爲誰然國初松之吏稱民安可想

約菴陳公潮以乙榜受學職後陞知州致仕張都憲濬  
其門人也正德乙亥御史來視學時松人欲入學者爭  
于於公千金可坐致也張就訪于家見垣壁不治意甚  
憐之公曰視做秀才時則已過矣張徐曰入學案猶未  
出蓋若導之言也公曰予所不敢預者有三壞名節一  
也驕惰人之子弟二也起奔競之風三也張起拜曰受

教矣公之介類如此而止始終不渝有足重云

一川張君其性東海之孫也厥考後樂公副憲廣西駐  
兵平樂而劾有通判某籍帳下得餘金四百兩勸性取  
之性曰父死而因以爲利可謂人乎豪釐無所取後從  
甘泉遊明理學爲盛德君子茲其一節云

顧職字東瑞松之老儒也博學能詩其弔朱端常墓曰  
玄堂千載寄崇阿石馬無聲墓草多故里尙傳前代事  
浮萍應落逝川波野人夜黑偷金盃山鬼天寒泣翠蘿  
莫問人間興與廢夕陽回首自興歌東江先生以呈西  
涯公公曰不意山林乃有此作

顧東曙能通數學嘗攷曆度之數纂輯成編每未頒歷  
可預知來歲節候宜忌之詳一日出示客客曰此私歷  
也得無犯禁乎始懼而焚之老儒博學而不知世務如  
此

元伯顏盛日上海有俞俊者賦清平樂云君恩如草秋  
至還枯槁落日殘星猶弄曉豪傑消磨盡了放開河海  
襟懷休教白鷺猜我是江南倦客等閒容易安排後仇  
家以其稿訴于官厚貽獲免而因以喪家然則君子豈  
可以其言哉詳具輟耕錄

青龍大盈之間多荒田彌望皆蘆葦之場甚至數十里

絕烟火雖有召募之令無有應者正德中內江喻公來知府事銳意講求乃議分設賑治使民聚貨貨通則田易墾治田墾治則可以省闢郡包賠之苦甚良策也規畫已定而天不憖遺今未有續而終之者

尚書伍公文定嘉靖甲申以操江蒞松有昔推常郡此盤糧粟米陳陳盈十萬之句東江先生曰詩雖不工而當時儲蓄之富可徵也按伍公推郡時當是弘治末年也而猶有十萬之積況周文襄時耶今之所以無者其弊有二逋負也侵欺也逋負固奸頑之常態而亦有出于不得已者猶可言也若侵欺則極爲可惡何也起運



之外存留以備賑濟文襄之良法也自易銀之法行而  
濟農之倉虛設矣積年之書手慣役之糧長每于領米  
易銀之際則虛開姓名報官名爲關米大戶而實自入  
以肥家至有一人而侵欺至萬石者積弊相仍莫甚於  
此槩郡計之其麗不億此與文襄之意相反甚矣牧民  
君子苟清此弊自足濟農何必爲勸借之令以速怨哉  
庚寅郡守長沙熊公宇頗究茲弊痛懲其尤者三數人  
時論快之然竟亦未盡革也

宋潛溪先生嘗爲上海夏宗顯作壩記夏蓋洪武中糧  
長也記稱其長謹好禮田賦皆先時而集不煩徵索愛

惜細民銖兩無所取以長厚稱夫先生之文實錄也政述之以告鄉人長賦者

藝文籍

自言游得聖人之一體而吳是以有文學浙吳之一隅也漢晉以降亦藝焉耳矣然興元一詔下悍卒之誤開一疏寒奸臣之心謂皆虛乎進于茲道不遠已作藝文籍

渾天圖漢鬱林太守陸績著

二陸文集晉平原內史陸機清河內史陸雲著按志機著文章三百餘篇雲著文章三百四十九篇新書

十篇茲集所載無幾矣崑山片玉皆奇寶也惜乎

四川清論散騎常侍陸喜著借諸葛孔明以行

玉篇輿地志符瑞圖分野樞要續洞冥記玄家表外  
集梁黃門侍郎顧野王著

宣公奏議唐中書侍郎同中書門下平章事陸贄著  
谷陽文集宋進士朱之純著

柳文音義進士潘緯著

洪範九圖九說進士陳伯達著

華亭百詠許尙著

靜庵集進士胡珵著

雲間志迪功郎林明卿直祕書省林至的著

同華亭令楊潛著

釋騷林至著

小醜集淮東提舉任盡言著

後樂集資政殿學士金紫光錄大夫衛涇著

禮記集說直寶謨閣衛湜著

學易蹊徑四書說約田疇著

莊子註高子鳳著

樗齋詩集朱允恭著

秋聲集常州守衛宗武著

祛疑說儲泳著

通鑑筆義進士葉汝舟著

湖山汗漫集趙孟側著

讀易管見進士衛謙著

古木風瓢集元夢昂著

王泰來集中庸管見聚疑原孟夏侯尙玄著

九峯清氣集陸朋著

百善百忍二圖邵天驥著

易象發揮易說通言童子問知吳江州陳宏著

原俗篇知新喻州羅璧著

律解辨疑副使何廣著

櫻華集太常卿真衡著

慎齋集焦伯誠著

杏園集張平著

鳳城稿仙素齋集封中書舍人金鉉著

漢東集教諭黃黼著

壯遊集按察使黃翰著

講餘集教諭錢復亨著

桂樓集范鼎著

夢菴集陸潤玉著

約庵集封監察御史張遜著

雪航集王桓著

大學說太學生張正宗著

瀛洲稿使交錄歸榮集南京吏部尙書錢溥著

雲間通志承事郎錢岡著

文翰類選長史李伯璵著

政監紀行集備遺錄交游錄史詠布政使夏寅著

定菴集南京兵部尙書張悅著

易髓學正張璞著

鳳山稿進士朱應祥著

九三子集進士曹泰著

調言長語教諭曹安著

雪窓詩稿上洋吳爰著

鶴城稿天趣稿面牆稿清和稿慶雲稿東海手稿東

海文集知府張弼著

宜晚稿續稿宜晚文集按察司副使曹時中著

西澗詩集知府陳章著

學吟稿拙庵稿楚游錄滇南雜稿副都御史唐瑜著

雪岑藁知府孫遠著

續通鑑綱目廣義訓導張時泰著



三江水學金蔭著

鶴灘稿翰林修撰錢福著

東江文集松江府志南京禮部尚書顧清著

玉屏山顧廷儀先生家弘治中生瑞竹定菴有詩地鍾  
靈秀幾經年造化從來本自然出土一根元瑩玉凌風  
颭舞欲參天未論板蕩成臣節絕似夷齊讓國賢春雨  
滿林還有作兒孫頭角看駢駢

袁方伯幼依外家受其恩外家故軍籍也及舉進士不  
忍貳之登科謾從其籍後竟以此隸籍戎伍不可解  
黃憲長幼時嘗以市于邵守不聽拂衣出口水上打

一棒耳守怒令作水上一棒詩徐吟曰誰把長竿杖碧  
流一聲驚破海門秋千屑玉線開還合萬顆明珠散復  
收鷗鷺驚飛紅蓼岸鴛鴦催起白蘋洲料應此處難垂  
釣急急收綸別下鉤守改容禮之

正統中松有兄弟進士顯仕者素不相能兄嘗題竹云  
種竹不須多多則令人俗蕭蕭三兩竿清風自然足其  
弟知之曰誰云種竹兩三竿冷落蕭疎不耐看直須種  
竹三萬頃搖動一天星斗寒其相激如此

松人烟火之技載在通志東江有詩萬變神奇火一絲  
偃師當日未曾知寶王流落浮空下香女輕娟隔霧披

明月止時雷礮發暗塵驚處火輪馳詞臣正憶鼇山勝  
爲報嘉賓緩緩歸此詩殆盡其變矣

浙江金廷桂嘉靖丙戌歲貢廷試第一家宰廖公紀以  
其鄉無賢範授東光訓導丁亥疏請學官由貢者乞倣  
會試例從所在鄉試許之遂著爲令有御史至學問其  
名令無跪對曰願天下之爲學官者皆無跪時論偉之  
張鳴鸞字世和正德初會試寓京時張文冕方黨逆瑾  
官錦衣氣焰赫然燕鄉之與試者窮極奢侈以示得志  
鸞獨不赴識者尙之任止金華推官

張文冕得志時有司立坊曰文武聯芳以其父衍嘗第

進士既歿乃徙坊于府學文廟之前曰大成宮嘉靖甲申樞與長谷徐君獻忠午江錢君思周倡議謂以級臣之故物而列於聖人之門非以妥神靈示瞻仰也請于巡撫東湖吳公廷舉亟命撤之

丙戌歲長谷徐獻忠宅上生瑞芝九莖郡守慎德何公齎扁其堂曰開光

廬墓割股古人謂非中道諒其志亦不失爲孝子但不可爲訓耳定菴先生嘗廬墓感白鳩之異西涯李文正公有贈言檜清陳泰贊割股肉愈母之疾錢文通公爲誌其墓皆松之獨行也可泯泯乎

松人屋後多植護居竹經幾年而茂密如簍可蔽風雨故名志稱哺雛竹誤矣

奈山有黃巢洞凡十八所今多崩壞間存甃磚相傳爲黃巢之亂避兵者

費榮敏公墓在鳳山之陽東海翁墓與之鄰今張氏子孫以配享后土蓋義起云

雲間通志載木棉花詩爲熊澗谷作松江府志因之然此詩乃見于方正學遜志集中按通志爲正統間錢崗所修時正學文字尙有禁而集未行于世崗或諱之而託之熊歟必有能辨之者

一統志曰李象賢合州人徙籍華亭明春秋舉文詞洪武舉任太府訓導子至剛博學能文亦舉明經累官禮部尚書兼左春坊大學士預修永樂大典出知興化府卒于官又曰李至剛永樂末知興化德量寬宏吏民化服在任若無所爲而一郡之人翕然大治夫一統志本諸國史宜無不公而前後松志于至剛之事皆畧之豈解縉之評先入之欺然縉所評十人劉儔其最下者而儔竟死節交趾得贈諡則縉亦不長于料人乎

孫華孫永嘉人元時以鑒名于松蓋亦託而逃焉者程雪樓時奉命採訪江南華孫辭以詩有曰率土豈無臣

語工而意亦深婉

麓堂詩話云張東海自謂文勝詩勝草書英雄欺人耳蓋不以其言爲然水東日記云前輩謂游藝當先有迹者學文勝詩勝書勝圖畫則知此蓋古語而東海嘗稱以教人人遂以爲東海自評也不然則東海嘗有吾死草書增價之語而不及詩文曷又自相戾也

神山舊名仲鼉伏首引尾形肖鼉故名相傳是山歲出圓石一爲鼉卵後人鑿石其首遂不復出今其麓累累多巨石云山之陽有崇真院院有神鼉仙館其扁相傳爲呂洞賓書篆宗垂露筆法古雅而中款回蟲書亦流

逸可愛神仙君子所不道校其執固神品也直迹爲太  
守吳黃洲持去今榜蓋臨本云

跋

松故述首余祖母舅細林楊先生所撰也先生諱樞字  
運之細林其別號云學窺二西文擅兩都親教其子中  
丞朋石及余父學憲公俱成巨儒博學雄文顯天下嘉  
靖戊子舉於鄉仕臨江郡丞卒於官後以子貴贈都察  
院右僉都御史先生遺集頗多是述其一藹也述之詳  
具先生自叙中余王大父一山公與先生密戚並家九  
山間嘉靖庚寅五月手錄而輯訂之存諸笥中爲家藏



書公字維敬官興國縣尉致仕家居杜門著述以博雅  
好古聞于時有樵唱集他纂書不下數十種是錄亦其  
一也周楊家多故中落向未付梓邇來吾鄉樂義之士  
不啻古人儻肯捐貲鋟傳以補松志所不逮其有功于  
前修後進良不淺矣敬陳巔末敢告長者萬歷乙未八  
月周紹節識

修志備覽

附錄

藝文

一山樵唱

江西興國縣主簿周禮著憲副定菴曹公

爲序

言史慎餘

淞故述

火餘碑著

雅歌譜

傳心數學

蒙正訖

俱江西臨江府同知

著 學道紀言

叔夜先生集

俱廣西提學副使

兼著

西堂日記

楊朋石遺稿

俱巡撫都御史楊豫孫著

墓

贈中憲大夫江西按察副使楊溥墓在蔡成涇之原子

贈福建延平府推官欽耐

汝南世德墓在蔡成涇

葬處士周榆子江西興國縣主簿禮孫誥封工部都

水司郎中雲鵠耐太僕卿鳳峯沈公尙書孫文簡公

誌銘

贈中憲大夫都察院右僉都御史前臨江府同知楊樞  
墓在蔡成涇之任淇浜之大理寺卿豫孫耐少師徐  
文貞公誌墓萬歷辛巳三月提學御史靳水李公時  
成給銀壹伯兩修墓委松江府推官范公守已府學  
訓導陳嘉學董其役 廣西參政楊銓墓在廣富林  
八曲里宗伯陸公誌墓 提學副使貞靖周先生墓  
在蔡成涇太僕卿鳳峯沈公愷前刑部郎中袁公福  
徵誌銘嘉靖丙寅正月巡按直隸御史昌邑孫公夢  
豸表之題其墓曰永豐

陽烏澤廟在蔡成涇廟宇甚隘中奉大士像靈異鄉人

每於歲首一日竭誠齋禱拈鬮以下歲之豐歉無不  
顯應

周楊讀書處在楊店萊峯與朋石兄弟競爽葩藻流聞  
聲震一時

一山書屋公諱禪字維敬號一山博雅好古以詩文自  
娛僻意山水之勝築室于周家草與同郡顧少宰東  
江曹憲副定菴孫山人東岑結社觴詠其間

無瑕和尚彈琴處在柰山禪堂周學憲萊峯聽琴詩云  
山寺人迹絕四花春正妍獨行入深山所求貴真詮  
忽聞弦上聲使我心悠然此聲不在指彼聲不在弦

聲聲詎無因不在絃指間思之若有悟惟與靜者傳

朱道人

不知其名唐行人初不識字嘉靖四十一年四月自首  
忽於紡紗時性真發見到九月有童子報以示寂之期  
在來年七月四十二年正月至柰山禪堂謝去塵緣四  
月間始露消息于人傳言漸廣七月五日周萊舉夏陽  
衢往見之問以輪迴之事道人云劫外修行方免得不  
輪迴一性昏迷萬事差寧可有足無眼不可有眼無足  
這箇血心切不可靠他此是凡心若見性直廣大無邊  
際這是正路我從前苦拜師俱不是自去冬忽然見性

之後方才曉得陽微問圓滿未曾圓滿了問打破  
虛空否曰打破了問消息的當否曰的當明日恐不能  
去曰決要去菲峯問定心之法道人指其心曰這個怎  
後他不思想在這裏做工夫怎免得輪迴因指其上曰  
在這裏做萊峯問如何做得曰這箇那裡照不到正是  
廣大無邊問何不在家脫化却到此曰有人言十方所  
在萬人相送連口裏壞太甚定不得心問去後認得今  
日眼前人否曰怎麼認不得問火起時痛否曰就如燒  
這木頭七月六日辰時沐浴畢登山拜謝天地放火自  
焚安然而化時大衆萬人皆相顧驚異合掌禮拜而散

王孝子節

居任淇浜業農嘉靖辛酉年父疾危甚節不告于家人以刀割其左股作羹進之父疾旋愈楊公豫孫表其廬曰白華遺響

災異

正德己巳庚午歲北鄉大水湮沒田禾周一山作憫農詩太息吳民當此劫迭罹凶歲肝腸裂去年七月禾將成大雨翻盆盡傾沒水深半壁屋已摧男婦赤脚行淤泥一冬柴米真珠玉留田售屋來充饑今春鬻女翻鋤遍又賣兒來時秧半誰知五月苦淋瀝洗落膏腴無一

片九山乘雲欲化龍樹林積雨昏濛濛新漲滔滔渺無  
際周遭稼穡沉無蹤東家嗷嗷西家泣何求花線供耕  
織寂莫蓬門盡日扃冷甕無烟米無粒紛紛餓草填溝  
河萬姓活少亡猶多總然勉強幾家在屋漏那有茹來  
鋪鶴髮臞翁筋力竭皤顏老嫗泪垂血今秋滿擬慶豐  
登却變郊原河柳濶老稚車戽欲救苗餓餒不足形容  
樵枯樺聲斷斜陽裏水衝埧岸徒爲勞荒邨漸覺人烟  
少落日空聞蛙鼓鬧風生畎畝浪聲喧鬼燐熒熒相照  
耀嗟彼蒼生圖苟延天意如此何由全寄聲憂國憂民  
相亟爲疲癯解倒懸



隆慶三年僉事鄭公元韶奉勅丈田均糧天游居士朱大章作均糧篇悉中時弊附錄

均糧便願均糧當塗體國細平章皇初奴屬崇畿輔區畫宏規奠此邦夏公稱土定科稅開公籌算協高皇按籍魚鱗供指掌飛科升斗戍邊疆民訟存糧近糾舛無糧皇土落何方法久弊滋思變法失調琴瑟待更張均糧他郡未均松引領願望相公相公歸來遮道訴乞贊監司奏九重九重軫念特監茲奏書論等鄭當時豸袍分節督糧事超拜綸音降玉墀均糧得請慰蒼生久旱甘霖荷聖明從此兒童皆了了掃除隱射稅糧輕去

年禾黍半登入督責丈量星火急限步畝均二百念尺  
寸成規那不得弓樣新頒索價高號紙虛名供是實都  
人供役到村中爭辨酒肴遠迎接機織拋空明復來夫  
婦相看有憂色奮髯鼓掌意揚揚小民束手如綿羊民  
間一草禁勿犯糧箱誅求竟不妨犬牙偃月在相抱町  
畦橫縱難較量椎朴農家那習算耳聽算子總茫茫孰  
我孔方移曠狹由他毛穎變滄桑久佃官田重納價放  
舟河面亦收糧幕窠飛籌聊覆較吏曹假手肯參商報  
稱公正皆持正檢閱良民果善良春來犁犢出東郊盡  
驅此輩入西廡廢中書算聚蟻垤官府文移森媚毛食

指萬餘糜粟提編三載審丁徭徭銀斂盡册未造明  
更夕改轉分撓敗筆成邱空紙鋪公私困弊日噉噉城  
西魚肉趁好賣可憐魚肉是民膏辛勤造册值炎天性  
罵鄉民少送錢鄉里乘風那敢後摩肩揮汗道途遑走  
向廠門怕呵禁隔溪月落猶遲延襦袴典傾稱月息枯  
槁頻歇損苗田照前田額科增重愁嘆歸來夜不眠慨  
水荷鋤晨起早又聞下令點排年排年爲要更新公家  
最息貧充役差點偏教富作貧賦獲千頭田萬頃一丁  
不役非王人坐樹數畝戶瓜分傍午追呼動比鄰貼地  
霜飛餘勁草淺池水涸斷纖鱗海叟檢田應下淚白壕

吏怒不堪聞禹圖貢賦松最饒舳艫橫江充轉漕惠  
元元宣德意豈知鴻鴈告劬勞呻吟病口願扶床胠病  
研精始配方果樹歲深蟲蠹齧郭駝殘蠹樹無傷君不  
見青蓮法界迷洞房細柳軍營直畫堂列肆星羅休稅  
課借棲螭角應坊廂庭除不治尤蕪穢谿壑焉能剔垢  
藏君不見上中下等界三鄉一鄉肥瘠又三鄉卑亢兩  
鄉偏澇旱中鄉平衍稍相當請向願均庭上坐更陳損  
益與低昂君不見揚灰砂磧荻蘆黃跋扈沉波菱藕香  
土著有人專此地素封千戶若爲強君不見田聯海若  
皆拋蕩圩墾陽侯混積荒平土植錐皆納稅夜舟遷壑

豈尋常君不見團窠丁男不記場屯田卒伍半逃亡公  
產役來空舊籍歲輸耗減苦迫償君不見吳淞吞泄貫  
三江變作陂田半插秧青龍雄鎮通海舳河流湮塞罷  
耕桑肯爲吳興理凋敝早疏禹績報君王福星一路照  
江南問詢父母每停驂興除利病公私便簡策昭然其  
可探明明天子大夫賢致效芻蕘奏短篇看取田疇歌  
子產枉航經術笑臨川時隆慶己巳季夏望日懷古嘔  
血書于抱膝廬中

天游居士朱大章字南儒少司成文石弟也少爲博  
士弟子博學能文章試輒高等及壯以貢自廢舉子

業讀書每倩人誦之卽強記至老不忘所撰詩文襍  
著不下千餘篇惜以無子俱湮沒無傳是篇洞悉利  
弊亦其一轡也